

南無本師釋迦牟尼佛



妙法蓮華經卷第六

如來神力品第二十三

爾時世界微塵等菩薩摩訶薩。從地涌出者。皆於佛前一心合掌。瞻仰尊顏。而白佛言。世尊。我等於佛滅後。世尊分身所在國土滅度之處。當廣說此經。所以者何。我等亦自欲得是真淨大法。受持讀誦。解說書寫。而供養之。爾時世尊於文殊師利等。無量百千萬億舊住娑婆世界菩薩摩訶薩。及諸四衆。天龍。人非人等。一切衆前。現大神力。出廣長舌上至梵世。一切毛孔。放於無量無數色光。皆悉徧照十方世界。衆寶樹下師子座上諸佛。亦復如是出廣長舌。放無量光。滿百千歲。然後還攝舌相。一時警歎。俱共彈指。是二音聲。徧至十方諸佛世界。地皆六種震動。其中衆生。天龍。人非人等。以佛神力故。皆見此娑婆世界。無量無邊百千萬億衆寶樹下師子座上諸佛。及見釋迦牟尼佛。共多寶如來。在寶塔中坐師子座。又見無量無邊。百千萬億菩薩摩訶薩。及諸四衆。恭敬圍繞釋迦牟尼佛。既見是已。皆大歡喜。得未曾有。即時諸天。於虛空中高聲唱言。過此無量無邊百千萬阿僧祇世界。有國名娑婆。是中有佛。名釋迦牟尼。今為諸菩

薩摩訶薩。說大乘經。名妙法蓮華。教菩薩法。佛所護念。汝等當深心隨喜。亦當禮拜供養釋迦牟尼佛。彼諸衆生聞虛空中聲已。合掌向娑婆世界。作如是言。南無釋迦牟尼佛。南無釋迦牟尼佛。以種種華香瓔珞旛蓋。及諸嚴身之具。珍寶妙物。皆共遙散娑婆世界。所散諸物。從十方來。譬如雲集。變成寶帳。徧覆此間諸佛之上。於時十方世界通達無礙。如一佛土。爾時佛告上行等菩薩大衆。諸佛神力。如是無量無邊不可思議。若我以是神力。於無量無邊百千萬阿僧祇劫。為囑累故。說此經功德。猶不能盡。以要言之。如來一切所有之法。如來一切自在神力。如來一切祕要之藏。如來一切深甚之事。皆於此經宣示顯說。是故汝等於如來滅後。應一心受持讀誦。解說書寫。如說修行。所在國土。若有受持讀誦。解說書寫。如說修行。若經卷所住之處。若於園中。若於林中。若於樹下。若於僧坊。若白衣舍。若在殿堂。若山谷曠野。是中皆應起塔供養。所以者何。當知是處。即是道場。諸佛於此得阿耨多羅三藐三菩提。諸佛於此轉於法輪。諸佛於此而般涅槃。

諸佛救世者 住於大神通 為悅衆生故 現無量神力

舌相至梵天	身放無數光	為求佛道者	現此希有事
諸佛誓效聲	及彈指之聲	周圍十方國	地皆六種動
以佛滅度後	能持是經故	諸佛皆歡喜	現無量神力
囑累是經故	讚美受持者	於無量劫中	猶故不能盡
是人之功德	無邊無有窮	如十方虛空	不可得邊際
能持是經者	則為已見我	亦見多寶佛	及諸分身者
又見我今日	教化諸菩薩	能持是經者	令我及分身
滅度多寶佛	一切皆歡喜	十方現在佛	并過去未來
亦見亦供養	亦令得歡喜	諸佛坐道場	所得祕要法
能持是經者	不久亦當得	能持是經者	於諸法之義
名字及言辭	樂說無盡窮	如風於空中	一切無障礙
於如來滅後	知佛所說經	因緣及次第	隨義如實說
如日月光明	能除諸幽冥	斯人行世間	能滅衆生闇
教無量菩薩	畢竟住一乘	是故有智者	聞此功德利
於我滅度後	應受持斯經	是人於佛道	決定無有疑